

պահեստներում, այլ անմիջապես տվյալ վայրից գանձում էին թիուղարներն ու համեսալեղարները կամ նրանց գործակալները:

Հրապարակվող ֆերմաններով, որոնք ուղղված էին տվյալ գյուղի կամ մի քանի գյուղերի համայնքներին (չամաաթ), կարգադրվում էր նույն հրովարտակում նշված հարկային ցուցակների համեմատ՝ հասանելի հարկերը վճարել այդ հրովարտակը ստացողին կամ նրա գործակալներին: Սովորաբար թե՛ բնամթերքով և թե՛ կանխիկ դրամով ստացվող հարկերը ամբողջ մանրամասնությամբ գրված էին լինում, իսկ հաճախ էլ հիշատակվում էին միայն դրանց դրամական համարժեքները: Այսպես, օրինակ, թուման-ե նախչևանի Սիսաջանի (Սիսիան) մահալի Դաստակերտ գյուղը, որը 1682 թ. որպես թիուղ տրված է եղել Բորչալուի հաքիմին, պարտավոր էր ամեն տարի իր թիուղարին վճարել 54.909 դինար, որից 15.009 դինարը ի հաշիվ մալոջհաթի (հացահատիկ և այլ մթերքներ), իսկ 39.900 դինարը ի հաշիվ ջիզիայի (կանխիկ դրամով)⁸: Գյուղչա-Դանգիզի մահալում որպես թիուղ և համեսալե վրաց աղնվականներից Ջալ-բեկին տրված Հասանբյանդի և Կարմունջ գյուղերի համայնքներից ստացվող հարկերի ընդհանուր դրամական համարժեքը կազմում էր 88.450 դինար⁹: 1704 թ. Վաղարշապատ և Քյուլթափա գյուղերի համայնքների միջև կազմված մի արձանագրությունից պարզվում է, որ Քյուլթափա դիվանի գյուղը բավական ժամանակ որպես համեսալե տրված է եղել Քալբալի Թաթարու-Այրումլուի որդի հաջի Մուհամմադին ի դիմաց 25000 դինար տարեկան ոռճիկի¹⁰: XVII դարի սկզբում Երևանի կամ Չուխուր-Սաադի բեկլարբեկիության սահմաններում դիվանի գյուղերից թիուղներ էր ստացել և սահմանապահ ծառայություն էր կատարում թուրքերի կողմն անցած Կաղզվանի հաքիմ Սուլթան Ալիկուլի Սաադուլուի որդին՝ Մեհդիկուլի բեկը, որը 1606 թ. լքել էր հորը և նորից անցել կրգըրաշներին կողմը¹¹:

Անհրաժեշտ է նշել, որ XVII դարում տրված թիուղներից ոչ բոլորը կարելի է դիտել որպես ժամանակավոր հողատիրության հատուկ ձև: Գոյություն ունեցող թիուղարական ֆերմանների մեծ մասը մեղ բերում է այն համոզման, որ XVII դարում թիուղ տրվում էին ոչ միայն այս կամ այն դիվանի գյուղի ողջ եկամուտը, այլ նաև մուլքային որևէ գյուղից կամ մի քանի գյուղերից գանձվող ողջ պետական հարկերը կամ նրանց մի մասը: Որպես թիուղ և համեսալե տրվում էին նաև այլ եկամտաբեր օբյեկտներից ստացվող հարկերը (վանքեր, հանքեր, արհեստավորական համքարություններ, առևտրական ձեռնարկություններ և այլն): «Թիուղը Սեֆյան իրանում,—գրում է Ի. Պ. Պետրուշևսկին,—նշանակում էր հողային հարկի (մալոջհաթ) մի մասի, երբեմն էլ այլ տուրքերի, բայց ոչ հողի և այդ հողի վրա բնակվող հարկատու բնակչության (ույաթ), պարզեումը ծառայության մեջ գտնվող մարդկանց՝ որպես ծառայության վարձ, հողային այնպիսի հարկեր և տուրքեր, որոնք մինչ այդ որոշ-

⁸ Մատենադարան, կթղկ. դիվան, թղթ. 2 ա, վավ. 101:

⁹ Ձայն Եղծղո, էջ 105—106:

¹⁰ Մատենադարան, կթղկ. դիվան, թղթ. 1բ, վավ. 214:

¹¹ تاریخ عالم آرای عباسی، جلد دوم، ص. ۷۴۳ فراخور حال مواجب و تیول شفقیت شد که در تابین بیگلربیگی چخورسعد بخدمات سرحد قیام نماید